

四庫全書

集部

欽定四庫全書

集部

考功集

目錄
卷一

詳校官中書_臣葉元符

中書_臣劉源溥覆勘

覆校官中書_臣康儀均

校對官中書_臣葉蘭

謄錄監生_臣龔際美

欽定四庫全書

集部六

考功集目錄

別集類五

明

卷一

賦

四言古詩

樂府

卷二

五言古詩上

卷三

五言古詩下

卷四

七言古詩

卷五

五言律詩

卷六

五言排律

卷七

七言律詩

卷八

五言絕句

六言絕句

七言絕句

卷九

書

卷十

序

記

雜著

臣等謹按考功集十卷明薛蕙撰蕙字君采

亳州人正德甲戌進士官至吏部考功司郎

中故以官名集正嘉之際文體初新址地信

陽聲華方盛蕙詩獨以清削婉約介乎其間

古體上挹晉宋近體旁涉錢郎核其遺篇雖
亦擬議多而變化少然當其自得覺筆墨之
外別有微情非生吞漢魏活剥盛唐者比其
戲成五絕句有曰俊逸終憐何大復羸豪不
解李空同其所尚畧可見矣又蕙與湛若水
俱為嚴嵩同年嵩權極盛之時若水年已垂
耄而怵於利害不免為嵩作鈐山堂集序反
覆推頌頗為晚節之累蕙初亦愛嵩文采頗

相酬答迨其秉政以後即惡其怙權病國不
復相聞凡舊時倡和亦悉削其稿故全集十
卷無一字與嵩相關其植品之高迥出流輩
是以詩格孤秀肖其為人其所樹立又不在
區區文字間也乾隆四十一年十月恭校上

總纂官臣紀昀陸錫熊臣孫士毅

總校官臣陸費墀

考功集原序

昔我武宗皇帝庚辰之歲余嘗從瑞泉先生游于京師
獲西原薛先生詞賦數帙尚則玄風聿祛末習漱羣籍
之芳潤擷百氏之英粵藻思鴻才卓哉有斐一時騷壇
詞圃操觚灑翰之徒邈焉寡儔先生方綰章銓署欲晉
焉請益未之敢也今上御極之癸未余舉進士先生同
考之未幾振衣南州余亦分符北海思覲睟顏聆玄論
未之能也乃歲壬辰余官中土分按南畿既見先生乃

舍彼舊學棲跡丘園游心理域德音秩秩昭然發矇不
我誣已乃知大道靡窮達人無我瞻彼羣什道中一藝
云爾雖然尼父定刪風雅並述將以性情所感斯道攸
存詩以理之孰云徒作統之暢湮鬱之思達神明之德
通萬物之情格兩間之妙詩之為用大矣哉夫道不遠
人詩非離道一以貫之存乎其人追念遐思爰請舊作
以貽同志並叙厥學庶有所稽焉皇明嘉靖十四載中
春十日秦中李宗樞序

欽定四庫全書

考功集卷一

明 薛蕙 撰

賦

孤雁賦

孤雁感物也。渦水上有孤雁，隨人家畜鷺鷥輩以取食。人或逐之，輒飛去。入左右洲渚間，然終不遠去也。

予游城西，有野人指示予，心惻然傷焉，因作賦云：

遵長河之峻阪，出城隅以西。徂望鴻雁於河漢，佇徬徨

而獨居容懇憐以愁賴音悽愴而號呼伊斯鳥之嘉淑
產異質於幽荒體貞信之至性動靜一其有常固羽族
之殊特衆鳥孰可與比伉故其行不失時止必擇所候
暖北逝先寒南下既冒險而涉危曾不恤夫勤苦惟衆
鳥之多智曰庀生之得宜弗一邁於艱難羨暇豫之無
期或巢山巔或游海涯奮首虹霓濯翼天池託戶牖之
巍巍下民莫得以或窺足無虛跼翼不勤飛資飲啄於
尋丈遷徙弗踰乎旬時何斯鳥之劬勞增荼毒其曷已

將材質之不倫固天命之難俟瞻北都與南國念家室
之靡止道路賈以遼遠間一歲而萬里復有羣侶中迷
雌雄死別目駭覓驚飛沉隔絕始迴遑而不進終躊躇
以永訣爾迺背雲路下緒風依沮洳潛蒙茸捐燕越之
故思甘愁苦而終窮雖六翮之尚在欲北歸其焉從於
是淪形晦跡亡精失志牢落遠遷躑躅無寄痛衆雛之
一隅慕同類之難值伺晨鳬而朝征逐鴛鴦以宵寐豈
卑湫之敢辭恥衆目之猜忌聲未鳴而先絕翅將舉而

復陞呻吟幽僻周旋林垌踐曠野之嚴霜食潢汙之流
萍延性命以苟存非初心之所營遭志意之摧毀中無
故而或驚況畏悸之叢至迫末路之惛惛避矰繳而往
來因鷹隼之縱橫思逸樂之無遺憂慄紛其相嬰若乃
陽律畢謝陰氣時作天清日迥草枯木落明月出兮皎
皎野露皓以漠漠戀南游於朱厓懷北棲乎玄朔魂魄
竦而怵惕顧形影之寂寞吐哀響之嘹唳志激昂而將
躍動幽谷之虛籟停高門之曉柝聞之者怊悵而自憐

見之者歎歎而不樂嗟斯禽之可哀像羈旅而無朋因
昆蟲之同感未若斯人之有情汎游觀而歷茲忽容與
而不行詠鴻雁於周詩泣涕下而沾纓覽萬物之參錯
悟大化之合并相吉凶與憂喜終同歸於杳冥齊百慮
於一致孰云天道之不平

四言古詩

昊天贈崔子

昊天單威亦孔之棘惜莫有戾不寧我國我國斯瘼我

民
用
卒
如
何
昊
天
云
不
我
恤

國之方將尚曰靡卜國之既悔伊何能穀昊天降詘弗
遂弗畜哀今之人胡俾天拯

有穰者木維其頻矣民之劬勞不遑辰矣戎作在圉內
有寇姦王事弘多寧有其殫

國既大廢君子于解三事朋友莫之能誨鄉士大夫曰
予弗逮昊天鞠怒則莫肯悔

憂心孔疚念及我友彼人有言我孔之恥曰予維服憂

我父母舍是弗思憂我天子

曰彼在位曾不可耽如賈弗售載反其琛懿爾君子亦
徂于南送子出宿悠悠我心

昔我邁矣朋友相予既憇于卒我心如沮匪往匪來云
我靡處之子于行憂心孔痠

瞻卬昊天則莫敢邇既夷既屆則不我咎君子于行尚
顧其後大命不忒爰其有止

昊天八章章八句

玄鳥贈蔣氏

翩翩玄鳥秋日載徂顓顓如何不遑室家悼我良朋憂
心瞿瞿

翩翩玄鳥載徂秋日顓顓如何不遑室家悼我良朋憂
心苑苑

翩翩玄鳥迨春而復之子于行將其不覿贈言匪多憂
心孔感

玄鳥三章章六句

晉七賢圖像詩

在昔有晉多士間出發揮上德彌綸道術遐蹤齊驚高
軌競軼竹林之徒厥維入室阮公矯志貴利弗就流連
沉湎却彼婚媾英材倣儻殆廼天授大人有傳跨騰宇
宙我我中散龍章鳳姿彷徨丘澤咀嚼雲芝神交隱淪
精感靈祇解形東市人靡能闕邈矣參軍神棲亡愕瞬
息萬代跼步六漠蔑盼貴介眈彼三爵禪中之譚實維
善哉仲容秀發頡頏叔父神闇均律妙洞擊拊郭奕心

醉荀勗妒嫖始平之出何其舛迂向子清悟莊惠同科
折辯神緯揚此玄波佐鍛抑下灌園巖阿徘徊鳴笛惻
愴如何巨源簡靜夙懷高舉逡巡待價儀刑朝序拔材
銓選畫議軍旅至道在躬是曰餘緒濬冲朗鑒神量玄
遠時哉多辟降志舒卷並美張裴附交嵇阮酒壚結懔
微情繾綣川則珠輝山維玉絢猗嗟七子亶時之彥中
行雖忒聿協狂狷丹青式績精爽如見

壽顧華玉母分得雲林夫人

金臺曾構瑤波潭池王母攸廬問誰侍坐姍姍季女一
何秀娟迺曰雲林仙人字我色侔瓊葉雲髮翠安陵歷
滄浪出入靈璫鳳飛戢香龍轉婀娜却陰芝蓋俯拾玉
果圃有洪桃花萼未墮紛紜周漢閭如石火湘靈舉楫
洛妃擁枕兼棲海右今邀江左

顧東江先生遺善堂詩

紛綸靈系昭晰瑞圖在昔帝嚳爰及昆吾嘉祥誕發茂
慶攸敷比暉四姓著美三吳

其一

谷水盤紆崑山岸寧鬱

彼顧林本支斯託豐謬未艾聞人間作式覽厥初匪今

伊昨

其二

三五迭終公侯復始維少宗伯克昌其祀祇勤

于德令問不已士瞻師表國賴耆齒

其三

履滿思謙居崇

鑒替于時念哉詔爾苗裔曰求彛訓曷以永世無或昏

逾祖考是繼

其四

昔爾先祖遺善自名烈考嗣之率是攸

行奕世載德用底昭明逝矣後昆無忝所生

其五

粲粲新

宮我我層構載俾祖號訓迪來胄畏愆若陞慕道罔後

天命不愆介爾蕃祐

其六

堂置詩書庭陳金石鳴鶴相宣

芳蘭如積入里修容過閭竦迹矧爾子孫孝思無斁

其七

丕葉遙興鴻源遐吐於赫祚膺邁追祖武千億重規雲
仍疊矩我歌此詩以告終古

其八

樂府

盛唐擬陽歌

盛唐擬陽歌者漢武皇帝作也元封五年帝南巡荆
陽親射蛟潯陽江中獲之作是歌

帝之狩順祥時察南服臚九疑會大海濟江淮朋神禹

逝九閩江之沛蛟魚出顯君伎誅弗率彎天弧索流矢
雷電隕赤江水叱東井治江維波神平水虫嬉兇惡伏
帝壽昌邁盛唐出擬陽

交門歌

太始四年漢武皇帝行幸不其祀仙人交門宮若有
鄉坐拜者作交門之歌

朝泰一陟分丘降石閭臨之杲熙事成徧東西祈交門
肇迎年陳玉席潔椒糈通八神召靈圉續徠翔神光燭

祭中壇華紫幄元禮登告嘉辭靈允答與帝期靈交際
萬壽徵帝無疆仙為朋

上之回

上之回禮靈時神心愉祚皇社上之回定諸國西南輯
震東北上之回樂孔博游昆田厯鳴澤上之回樂無射
年萬億長無極

善哉行

來日大難痛心疾首今日為樂莫懲其後大難如何昊

天不嘉吉凶有時人莫之知鹿之游斯在彼中野庖人
調和將以為脯翩翩白龍好是魚服豫且射之載中其
目少康出畋不復其舍戎王朝卧廼縛尊下式戒在始
式備在終匪戒匪備害于其躬天命戾止匪夙則莫勉
爾在位無俾天怒

煌煌京洛行

猗猗猗桐斤斯斧斯人之維良胡俾遺之豈弟君子人
之是穀君子不弘人之無祿絺綌在冬子曰有衣終朝

不饋子曰罔饑此之仡仡子曰不力彼之揭揭子曰不
直有管有蒯女子采之九九之術齊君禮之室周讓御
簡子是取臧文之賢譏於孔父吁嗟士人生之窮兮我
思古人惟周公兮

黃鵠篇

飛飛者鵠于彼蒼天大風阻斯羽沉于淵有松有柏其
枝嶸嶸雨雪迨斯化為枯薪烈烈冬日蕭蕭北風雖有
神龍宛彼地中天命有假人謀有仍嗟哉士人曰予無

能舟利于川弗利于陸君子于行維顛之速相彼哲人
爰得我匹且以嘯歌且以永日

臨高臺

臨高臺下有萬丈之洪波羣山沓蹙第鬱乎其隈疾風
起兮南北陂池沸渭而成雷時却顧以自失心慙慙其
傷懷北望深林叢生崔嵬柯條糾而旋互榮采駁犖乎
巖崖衆鳥哀鳴聒日夜猛獸垂啄旋踵而徘徊嗟君無
萬斛之淚胡來乎此地一來此地何由迴

雞鳴篇

雞初鳴日東御月徘徊招搖下雞再鳴日上馳登蓬萊
闢九闔雞三鳴東方旦六龍出五色爛

雉子班

雉子班五文章錦為衣繡為裳狀瓌異志勁剛美為災
技自妨翬雲羅掩天網就樊檻辭山梁荷仁惠不殺傷
啄甘實飲清涼形柔暱意悲惶惟平生詎有常感恩遇
回中腸循周榮棲幽房委微命畢君傍

君馬黃

君馬黃臣馬玄二馬並驅君馬前君馬前臣馬後山高
路長馬不走君當行臣當歸與君齊足馬能希

巫山高

巫山高鬱鬱襟帶亘天涯上靡白日陽下陵青雲眉玄
巖何差我層巘互參差景象非一狀遠望令心悲獻歲
出游獵千乘齊交馳翠帳羅曲阿羽蓋垂瓊芝龍騎踐
蕙圃鷁首戲蘭池回車背中路娛樂未云疲置酒景夷

臺設禮高唐祠君王千萬歲歲長如斯

江南弄

芙蓉嶼口茱萸潭朱唇一笑酒乍酣牽裾並袂歌江南
歌江南望塞北思不見情無極

鳳笙曲

白玉作筩黃金葉鳳翅差池凰羽接奇弄徘徊曲重疊
曲重疊聽增傷鷗雞舞白鶴翔

游女曲

春草纔生春水沒江南少婦歲春月步拾明珠曳羅襪
曳羅襪動春衣留中洲憺忘歸

朝雲曲

流光動豔影徘徊稍集楚館臨荆臺乍近復遠望不來
望不來竟偕逝攬女衣游雲際

趙瑟曲

春風初闌花半落美人挾瑟坐重幄促柱催弦勸君酌
勸君酌為君歌君不飲柰愁何

宮中樂

偶過昭陽館雕櫳閉絳紗卷簾通一笑落盡滿庭花

從軍行

玉韜錦絲條珠鸚白雪毛甘泉望烽火一夜過臨洮

折楊柳

三月盧龍塞沙中雪未乾朝來折楊柳春色憶長安

采蓮曲

眉暈風吹薄衣香水濺消朝朝采蓮去空轉木蘭橈

綠水曲

春洲霽煙雪潺湲激綠水戲羽亂參差開花雜藿靡綽
約蕩舟人嫵娟弄珠子芳菲不可忘冶麗復如此

隴山

隴之山兮在彼西北子之征兮防禦中國隴上之木鳥
不肯息隴下之水魚不肯食

游俠篇

君不見翩翩游俠子虎變龍淪世叵測轉海摧山力無

比君不見闔廬堂上養死客吳王酒酣客進炙千金匕
首匿魚腸俄頃蛟龍飛霹靂又不見夷門老翁屠肆兒
陸沉大梁人豈知竊符奪將付公子秦人北解邯鄲師
古來豪傑皆若人意氣激昂肝胆真傾軀寫心不自惜
排難解紛如有神丈夫自是英雄者左拉荆軻右古冶
寧當刎頸卧道傍誰能搞死蒿蘆下君不見虞卿齷齪
絕可憐託身魏齊捐相權平生著書萬言在不如刺客
三尺之龍泉我今落魄復如此放歌飲酒長安市結客

曾過滄海君報讐欲借幽并士酒闌擊劍歌莫哀眼中
豎子何有哉明朝事就拂衣去却隨梅福觀蓬萊

聖人出

聖人出應昌期受命上帝下民咸來歸聰明冠羣倫道
德何巍巍虛已彌謙畏入有輔弼出有師俊乂起為股
肱讒佞比周退而無所施教化之行自京畿四方取則
莫我違人草其心不自知復反醇厚去澆漓和氣綢繆
風雨時百穀被野多如茨醴泉流溢生靈之慶雲在天

神爵飛四門大闢通九闡南面端拱垂裳衣羣臣上壽
獻歌詩天子萬年兆民永賴之

戰城南

戰城南軍敗歸卻行入城為虜圍虜圍急士心悲外無
援兵虜馬縱橫馳顧謂同舍兒旦暮迫死期虜來殺我
盡何人報我子與妻戰城南良可哀今年出戰不復還
明年更驅生者來暴虎或可活擊虜決不回請看長城
下白骨何壘壘吾聞古者天子守在四夷何必使中國

之民填溝壑於匈奴之地為

短歌行

蟋蟀在堂野有繁霜我心悽悽不可暫忘豈無旨酒可
以燕游豈無琴瑟可以娛憂瞻彼日月終古而在百歲
之期寧莫我貸人亦有言道憂世促千載一遇匪遲伊
速異世而合夜夢周公同堂而違仰視飛鴻秋有枯槁
春榮則多嗟我人斯其如何何

君子行

君子思危懼不終日衆人居安沒齒自逸君子思退如
迫于淵衆人思進如逐于田損益之變何其相反苟非
明智孰能及遠人知其終莫知其始吉凶之萌鮮不由
已上天無私何怨何親福不擇家禍不索人道有險易
事有從違於乎小子慎爾所之

隴頭吟

沙漫漫石簇簇馬仆車摧隴山曲隴山日日行不前夜
夜還從隴間宿關東只說羊腸坂那知隴坂如天遠隴

阪遶迤距西域古來此地希人跡山川本是隔華戎
君王直欲吞夷狄自從漢虜互相讐塞上風塵無日休
幾羣天馬來荒外百萬征人戍隴頭堪嗟百萬征西卒
半作隴山山下骨誰為戎首禍斯人後有漢武先嬴秦
秦家無策良可嗤漢制匈奴空爾為願令邊郡謹備寇
不用中原多出師

日出東南隅行

日出東海隅西入崑崙墟六龍踴躍駕日車往來萬里

裁須更人生寄一世逆旅難久居義和何不仁感迫更
相驅顏回短折果何辜老彭竟化千金軀蒼天夢夢白
日闇居然不辨賢與愚吾將命后羿仰射三足烏焦饒
弋鴻鵠作計良已踈魯陽揮戈等兒戲夸父奔走空區
區西方調御之丈夫教我脩道歸虛無虛無國中無壽
夭一任義和變昏曉

猛虎行

饑不從猛虎食貧不從權貴游猛虎窟中多惡少貴人

門下非清流蒙鳩巢葦苕乾鵲代渠愁飛鳶啄腐鼠鳳
凰見之悲且羞長安道上車馬客處身頗似二鳥儔芭
苴不獨結諸公脣舌還能媚五侯紛紛豎子焉足數可
惜英雄亦同伍賢人翻在平津閣文學來依車騎府男
兒貴作不羈士逶迤匍匐何辛苦君不見會稽狂奴真
傲倨萬乘留之徑歸去羊裘懶卧七寶床釣竿笑拂珊瑚
樹

出塞

陰山虜騎喧上郡羽書繁匈奴入邊地將軍出塞垣奇
材募荆楚善射選樓煩朱旗類電掃玄甲若雲屯懸師
度沙漠飲馬抵河源金鼓青天動風塵白晝昏怯夫思
勇鬪死士恥生存月氏方破滅日逐盡崩奔都護領西
域呼韓守北藩當令四荒外咸知大漢尊

元會曲

握乾御紫極出震撫青陽履端受百祿朝宗來萬方玉
輅充庭陞金奏響嚴廊垂衣揖羣后置酒燕周行欣欣

醉湛露穆穆仰天光千春賀元會懽娛良未央

對酒

畏塗有千慮勞生無寸隙唯餘對酒時暫作伸眉客妖
姬雜睇笑懽友連衿烏相逢判一醉錢刀非所惜

春游曲

春來春驟好春游須及早招邀南國妹追逐東郊道合
尊圍綺樹調絃藉芳草人生非取樂空令少年老

長安道

神州應東井天府擅西秦雙闕南山下千門渭水濱公
卿畏主父賓客慕平津方朔何為者虛稱避世人

洛陽道

鳳闕正中天龍池帶洛川層城三市列複道兩宮連錦
障藏歌伎羊車戲少年更逢嵇阮輩長嘯酒壚前

劉生

劉生喜輕俠關輔遍經過新市踟躕戲高樓擊筑歌駐
車訪朱亥爭博叱荆軻不為微名譽惟矜意氣多

關山月

迢遞關山道淒涼霜露時如何秦地月亦自到天涯切
切胡笳怨蕭蕭邊馬悲高樓有思婦苦樂詎相知

驄馬

驄馬負奇氣昂昂態不羣綠駿搖鳳鬣赤汗染龍文
影思邊月長鳴向朔雲願馳千里足一戰立功勳

送遠曲

勞勞亭下秦淮水錦帆搖搖繫沙尾少年遠作萬里行

愁結雙娥低不起向來祇為新知樂不悟翻成別時惡
尊中安得千日酒同埋黃壚亦何有

江南曲

江南光景殊無賴水如碧玉山如黛吳王舊苑芳草多
鴛鴦飛過斜陽外船頭醉岸烏紗巾興來遍看江南春
五湖倘遇范少伯奪取當時傾國人

隴頭水

隴關出塞路征客離鄉思忽聞嗚咽水共下潺湲淚

夜夜曲

烏栖瑣窓靜露下羅衣薄脉脉對蘭缸夜夜同煎灼

芳樹

芳樹榮春日萋萋盈後園絳房承露坼素葉向風翻散
影連雲屋吹香入綢軒美人來已暮零落復何言

白雪

白雪擅紛華耀此玄冬暮榮迴飄朔吹蕭散流陰霧已
並粉闌鮮還增玉階素願欲集君筵皓齒多相妬

將進酒

將進酒杜康之族無不有處州玉露金華碧襄陵鵝黃
河內白我家綠醞亦無敵五君合計幾萬石一日一石
當擊鮮樂飲可支三十年不須虛無求列仙不須拈摘
縛幽禪壺中之道極玄玄養神鍊魄合自然眼花耳熱
體蹉蹉舉觴一酌滄浪天天地變化無時休日月出沒
不少留人生戢戢蜚蟻儔須臾零落歸山丘開闢至今
八萬秋古人覓魄猶在不喟然念此令人愁惟有杜康

堪解憂君不見咸陽白帝子并吞六國心未已百年謾
作萬年計恰似蜉蝣望秋水又不見西楚重瞳公諸侯
震盪趨下風喑啞吐嗟氣蓋世螳螂怒臂將無同兩雄
恣睢浪自苦自餘么麼何足數君當快飲我起舞樂哉
醉鄉真樂土作歌者誰君采甫酒徒之名垂萬古

行路難

三首

君不見山中行人羸虎腹復有貪狼飽人肉天生二物
毒爪牙比似讒人未為毒讒人之毒在利口能覆邦家

如覆手一夫中傷那足悲萬事紛紜真可醜君不見伯
詬加誣子胥刳越師西來吳國盡又不見上官納譖屈
原死楚王翻為秦地鬼讒人反覆不可憑變易是非移
愛憎重華聰明疾讒說詩人怨憤刺青蠅青蠅營營點
垂棘讒口嚚嚚排正直已於平地置機穽更向通衢布
增弋可憐豪傑死道邊總為奸邪在君側行路難行路
難只在讒人唇吻端寧當脫屣蹈東海不須驅馬入長
安

我歌行路難什百之端歌一端大夫委質事天子豈謂
當由左右始九重遠遠壅蔽多疏賤孤臣竟誰恃君不
見賈誼上書談世務漢皇欣然絳灌怒抵言旦暮即公
卿一麾却作長沙傳又不見董生硜硜守廉直儒者安
知丞相力白頭不得里中卧遠徙膠西驕主國二公之
事畧無異史策紛紛多此類餘風積習傳至今覆轍危
機在平地沛國迂儒不曉事酷信丘軻泥文字往年抗
疏撓逆鱗賜玦歸來十二春豈無高足據要津未肯低

眉千貴人貴人方寸九折坂况我三輪行不遠帝閭無
路欲何之五岳尋仙未應晚

男兒有事在四方我今胡為不下堂白首徒懷經濟策
青袍虛忝尚書郎早年不睹道路澁慷慨登朝期樹立
萬分論議甫一吐羣小猜讒俄橫集自茲投劾歸田里
洶洶風波猶在耳敢恨流離世不容獨幸崎嶇身未死
摧藏無復異時意攀援永謝同朝士始悟高賢好長往
却愧頑疏昧知止君不見當時汲汲魯中叟褰裳濡足

常奔走七十二君冀一遇
拊鑒方園終不偶
楚狂悲歌傷鳳哀
鄭人竊悼喪家狗
大聖行藏且如此
小儒功名亦何有
閉門不免憂饑寒
出門險巇千萬端
禍福重輕君自看
不如解却頭上冠
懸車繫馬但高卧
莫歎人間行路難

從軍行

少小慕功名
擊劍復談兵
誤信封侯事
甘作從軍行
一朝備行伍
幾處罹辛苦
西南通遠裔
東北攘邊土
武帝

雄材畧土宇新開拓銜命馳嚴馬登壇延衛霍諸將竟
邀功歲歲出臨戎勒兵盈塞外發卒徧關東騷屑干戈
動蕭條田野空廟謀貪戰伐邊隙開胡粵軍興急星火
兵連淹歲月戈船下厲水策馬踰葱雪山川行未半容
鬢驚凋換寒冰手指慄炎風肌肉爛思鄉已淚盡望遠
堪腸斷怫鬱魚泣津凌兢猿眩岬悠悠歷絕國險道何
傾側虎穴詎可入鬼方寧易克間使閉昆明單兵陷䟽
勒全軍有天幸從吏無人色天時變殺機壯士奮兵威

飛矢風鳴鏑推兵血濺衣長驅五王國大破九重圍萬
里懸旌出三軍奏凱歸邊垂日無事烏盡良弓棄行直
貴臣憎功高同列忌賞格多排沮謗書仍負累白頭還
士伍赭衣從吏議輸力奉明君忠邪不見分丹心徒貫
日劍氣枉凌雲人事竟莫測天命諒難聞可憐麟閣上
不畫李將軍

長門怨

新懽待清宴舊寵棄深宮相妬本相似君恩那不同歌

喉嘲飲泣鬢髮笑飛蓬誰信黃金屋繁華一旦空

長信怨

異時陪玉輦同載召娥眉寵極有哀歌恩深多怨思秋
風吹網戶春草被丹墀不及主家伎空歌團扇辭

莫愁曲

儂家住石頭綠水繞歌樓不是工娛客何緣字莫愁
江水映江花春光滿狹斜金陵衆年少爭到莫愁家

燕歌行

漢初匈奴雄北邊邊城蹂踐何蕭然歲歲金繒輸蜀帳
年年烽火照甘泉武皇憤怒按劍起詔遣將軍擊驕子
隴西壯士出玉門幽冀精兵度遼水遼水風濤駭陣雲
燕山雨雪雜兵氛河南昔日駐代馬塞北今朝屯漢軍
軍中嚴鼓催軍發陣前突騎爭馳突飲馬懸愁瀚海乾
彎弓已射旄頭沒喧喧將士劇風雷惴惴匈奴若死灰
單于夜半冒圍去校尉平明逐敵回收兵反旆休沙漠
三軍歌舞從軍樂腰下金刀尚血流帳外旂裘俱面縛

捷書駱驛入咸陽
凱樂鏗鉤朝未央
肘後何須列侯印
殿前願奉萬年觴

從軍行

少小習刀兵
從軍右北平
先登百死陣
却破五重城
邊郡勤王苦
中朝論賞輕
封侯自有數
安用怨匡衡
受詔辭金殿
提兵出玉關
黃雲連大漠
白雪滿陰山
虎騎馳天外
龍泉吼臂間
匈奴儻未滅
定自不空還

征人怨
苦寒關塞更漫漫
石堡依山峻
沙場並海寬
徒

行隨博望仗劍斬樓蘭邀取麒麟畫祇令後代看

代馬乘秋動邊城正宴開天寒弓力勁塞迥角聲哀勁
卒憑陵至孤軍折北迴不知漢天子何日棄輪臺

涼州詞

隴西西去抵涼州邊塞蕭條處處愁青草不生青海曲
黑雲常聚黑山頭

從軍行

冒頓南侵塞嫖姚北出師連營羅組練分道引旌麾躍

馬爭前列摧鋒肯後期鼓行趨上郡席卷向邊垂虎旅
聲先振龍庭勢已危追奔忘遠近轉戰決雄雌漢將功
成日匈奴數盡時孱王逃絕幕窮寇聚降旗獻捷歸雙
闕揚威耀四夷從今橫吹曲增入凱旋辭

鳳臺曲

秦娥嫁蕭史新起鳳凰宮吹簫白日上攜手綵雲中一
別人間去千秋樂未窮

春江花月夜

春江歌綠水綵鷁戲金沙玉釵初映月繡帶乍藏花窈
窕皆相似無如張麗華

飛龍篇

晨登金壇神君所治芝草叢生玄泉泌泌乘彼飛龍以
遨以戲憫我哀老乃告要祕周流神庭壁門十二授我
神藥盛以玉笥教我服食長生久視優哉游哉歲等天
地

戰城南

戰城南出城北城南戰尚可城北戰不測清晨跨鞍馬
迎戰城南下敵騎四面來提兵入中野中野何蒼蒼殺
氣互低昂前臨五單于却距左賢王日出負戈起日入
未能止人馬同時困自念身當死身死棄山阿化為泥
與沙平生安足惜國憂將奈何

考功集卷一

欽定四庫全書

考功集卷二

明 薛蕙 撰

五言古詩

效阮公詠懷 三十首

翔鷲赴長飈
翩翾戾高冥
舉翮覆白日
伏頸雲間鳴
顧謝野田雀
飽俛營此生
與子各殊塗
無用相譏評

有已苦拘閔
無生懼飄淪
憂樂多所惑
違取喪其真
聃周久已徂
此辯將何陳

存亡豈殊趣往復固恒理人生無延期百歲有成毀即
事且難預榮名竟焉恃感此愁我腸歎息未能已仰悟
牛山對慚恨自今始

萬物豈不衆而予獨吾生吾生不暇治安用求其羸執
籍雖利重刎喉非禍輕知哉屠羊子反市避三旌主父
厭擯斥自謂甘倒行生幸五鼎食死仍五鼎烹

羣狙競芋栗喜怒隨轉移飛飛海上鷗矰繳不可施張
儀謝蘇君趙令說李斯小義鮮能終邪徑固多岐利害

異目前親讐在一時他人各有心媮樂且相欺僥倖昧
全圖此計良可嗤

飄風振玄幕若木零朱華六龍匿西山濛汜揚其波翩
翩市中子於心太回衰不見顛顚色但聞慷慨歌卑危
誠未遠禍亂豈在多人人恤其私安能尚顧他已矣勿
重陳嗟予可奈何

生平保至貴變化去須臾登遐上飄飄舉步臨九衢閭
闔正晝啟陟降太微居曜靈闢重光長風厲六虛雌蜺

左右翔雲蓋翼前驅回車層城野總轡崑崙墟羣聖為
我族五嶽為我廬豈與鄉閭子握手少躊躇

朝登古臺上遙望大河陰朱明來自南隆暑倏已臨丹
霞曜陽景渥露霑玄林炎風振曾柯鳴蟬響哀音四時
代終始變化遞相尋盛長固殊昔遲暮方在今感物切
悲情愴歎傷我心

才美未足喜技惡未足歎左右無親交雌雄安可言不
見龐眉尉三世不徙官雖有韓長孺百金賂武安功名

復如何巧宦良為賢

生才良不幸處世誠獨難
揚娥興妬階懷璧賈罪端
靈均既見放韓非亦自殘
奉身失所從慷慨使我歎

北冥有異物神變何崢嶸
上為千里鷲下為萬畝鯨
倏倏自足賴升降非已榮
羞彼雉爵化齷齪忝我形

曠望三河側輕車並華輶
壯盛值今辰志欲一來遊
路傍續紛子馳驚各有儔
腹內懷辛螫側目起相讐
晏嬰畏仲尼惠施忌莊周
疑似不可居俯仰生留尤
感彼行

露章獨處安所求

卷二

昔有中黃伯立僅一何勞右手搏雕虎左接太行獠豈
如東海翁嗜酒佩赤刀粵祝終不驗側身焉所逃

蛭蛭桑中蠹戢戢託爾軀下枝翳沉液上條咀槁膚飲
食亦已遂不念彼樹枯樹枯竟何如憔悴在須臾飄颻
雲間龍卑高一何殊變化成霖澤千載長相俱

天上何所有上有九重臺日月闢房牖河漢界兩階白
虎夾路隅青龍啾啾啼五嶽當束脯四海充一杯衣裳

被雲氣左右結雙螭彗星垂為帶北斗束為觜舉足厯
顓蒼往往不復迷朝集扶桑東夕降若木西

人生非殊分天命自有涯置此儻來者安用矜且夸出
蚩當路子欣欣一何多玄冕結長纓丹組垂纈羅采曜
連金璽文繡雜鳴和順風激清塵向日揚芬華意氣肯
少假顏色每相加不見蜉蝣羽日夕歎咨嗟

蟾蜍宿南箕陰鬼淪東溟乘風避其災首旦集魯城神
飈鼓洪濤雷電正縱橫大魚裂地底崑崙勢如傾西山

有精衛舉翼方遠征志意豈不偉惜哉馬所成

龍伯有大人輕出越故疆東上五山巔學釣尾閭傍六
鰲曳獨繭員嶠沉北荒天漢斷西流海水自飛揚列仙
涕滂沱帝側巧中傷手中握朽骨魁壘不得長

生理一何殊巨細各有當壽陵入邯鄲匍匐大道傍西
河惑交戰中山忌重傷揆力非所任矯枉失其常如何
紛華子生平厭膏粱閒居羨幽深臨岐久徜徉貧賤誠
不易鴟毒安可忘行矣反故塗貽爾以斯章

窮漠萬餘里海水周四隅中原勒千乘翱翔順風趨白
羽翩翩飛一軍驚且呼揚鞭下高闕長纓繫單于右行
臨月窟左旋出日區立功何足矜猛氣聊以舒

茲年忽將逝我心愴以哀日暮不遑食空堂獨徘徊駕
言出西城中有池與臺清渠夾阡陌寒露被蒿萊慨念
昔時人零落安在哉玄象無淹次四序倏如摧自非藉
榮名一日等塵埃

朝出上東門追遞望三川修塗未能半險阻屢遷延征

馬立踟躇徒旅念歸旋捷徑不肯入安用直如弦
攢攢
罹苦辛失路誰當憐

昔聞黃靈樂乃在洞庭傍一奏魚愁入再奏鳥悲翔大
聲豈不妙細物焉能當獨有雙玄鶴延頸遙相望

嘉穀敗荼蓼良巢毀茅鷗路傍張四羅戢羽落卑枝卑
枝亦已足尚須保其危捷捷少年子挾彈來追隨俯仰
偕儔侶言笑盛容儀當面施柔謙中心懷嶮巖詩人亦
有言正直神所依禍福有固然反側焉能稀嗟爾衆多

士茲理不可違

昔余少年日浮湛聲色場追逐公孫子馳騫狹邪旁一
醉累旬朔一出歷四疆歡樂未及竟憔悴使心傷晚讀
列仙傳始學却老方萬事不足競二物焉難當十年燒
丹液効狀亦茫茫更希遊玄漠得失兩俱忘

守道遺榮利趨物喪其真詘伸難並觀高尚良可倫不
見玄廬子精神已無存煌煌口中珠含此誰為珍富貴
焉足求甘我賤與貧

涼風起中林槁葉落如掃徘徊此何時歲暮一何早吾
生隨物化安得不枯槁惆悵終日夕延頸望雲島榮名
非所慕神明可長保手把三皇文五嶽訪芝草

朝游東海上親見安期生袖攜麻姑書揖予上天行忽
忽從之去一舉陵太清白榆何厯厯桂樹亦青青朱爵
七十二鼓翼相和鳴玉女顧我笑執手戲紫庭萬歲同
娛樂天地長齊并

朝逢遠遊子車馬一何閑問君安所之道路方獨難人

情惡特立世態好纏綿
一身欲誰從多門易生怨
行行保子驅歲暮當來旋

啾啾田野雀徘徊丘中阿
上飛有鷹鷂下飛有網羅
人生誠未易禍福豈在他
譽者日已少惡者日已多
感彼恭士言悔恨將如何

雜體詩 二十首并序

詩自曹劉下逮顏謝體裁各異均一時之雋也及江
文通擬諸家三十首雖間有未盡然可謂妙解羣藻

矣余慕其殊麗依之為二十首略者十人慚鳬企鶴
罔量非倫云爾

班婕妤

詠扇

團扇團如月月色比光妍此物豈云美君子心所憐炎
暑充提攜清風何翩翩但畏秋氣至微質遂見遷懽爰
始難畢中路傷棄捐

魏文帝

游宴

命駕游西園回輦高臺傍鳴笳引鮮飈羽蓋隨風翔靈

泉依石渠綠波注金塘芙蓉吐朱華翠樹自成行飛禽
映水曲潛鱗踊魚防零露停豐草良夕殊未央白雲含
綺霄朗月垂素光仰看天漢上中心何慨慷人生非洪
喬壽命安得長恣意百年內懽樂莫相忘

陳思王

贈友

西京興亂階四海罹艱厄皇佐奮神武股肱効羣畫英
賢盡同朝夙願今始獲並坐接華裯聯步陵飛閣中饋
薦甘旨金罍汎清酌眷言申情昵終讌展謔譔君子肅

令儀俯仰存謙約明信良可希驕盈義所薄各享百歲
期鑒此平生諾

劉文學

公謙

步入西苑園游戲芙蓉池明月照綠水神飈散文漪層
軒跨通川雕檻承丹梯衆賓列長榻不醉且無歸莖莖
泛清波華萼正參差清歌隨風轉宿鳥東西飛公子興
藻思濡翰相招攜小臣非吉甫答賦安能希

王侍中

從軍

出車鄴城外，駕言指南鄉。我君整六師，赫怒征東方。千
艘汴淮浦，武騎發河陽。豈不懷歸思，王事不可忘。鬱鬱
涉長途，觸目多憂傷。葭葦盈深崖，榛棘蔽高岡。悲風振
中野，陰雲起迴翔。羈鳥鳴我前，孤獸馳我傍。伊昔東山
人，三年事戎行。捐私報公家，終以反故疆。勉哉同袍子，
永言視斯章。

阮步兵

詠懷

驅馬出中野，遠遊西山阿。升高望四海，惻愴將如何。崑

崙不可見六合垂網羅悠悠存亡門往來苦相加願隨
安期子竦身入朝霞應龍扶靈輿倏忽經九遐逍遙宇
宙外千歲復來過

張司空

閨情

初月升簾櫳涼風吹綺䟽佳人阻晤語永夕獨躊躇羅
幃張虛宇朱火照堂隅樂闋歡不足悲興哀有餘寤寐
思淑麗拊衿歎離居

潘黃門

羈宦

登城涉層軒遙見洪河隈
迅飈拂窮坂陰湍涌幽崖
哀鴻唳空臯征鶴翔高隄
長秀延芭蔓喬幹垂華莖
跂予顧南路目極眺京畿
清洛迥無津崇芒鬱崔嵬
改服就外役夙夜守班司
具瞻慚民望嘉命慙皇私
異彼伐檀人徒蒙素餐譏
撫已良自悼何以蔽前非
操刀無餘技烹鮮有遺規
雖乏禮樂才富庶聊可希

陸平原 行旅

發軔指修塗頓轡臨廣川
居人並集送游子私自憐
故

鄉日已遠親愛坐相捐攜手一何促分袂難久延絕景
不可尋遺音邈以綿憂來鮮再逝懽往豈重旋靡靡永
徂邁冉冉薄暮年涼風起平陸積雪被長壩幽谷生曾
陰高嶺結飛泉寒鳥無宿棲猛獸行不前惆悵感平生
怨此世網牽懷歸殊未遂愀憤何由宣

左記室

詠史

璇臺麗白日曾閣切天階朱門夾馳道甲第列東西
我衣冠士濟濟照金閨長嘯霄漢間歸來尋舊溪箕山

為我友首陽為我儕洗耳千仞壑采薇清雲梯

張黃門 苦雨

金商送寒節火旻迎朝露斐斐丹霞滅翳翳玄雲聚密
雨灑踈叢輕颺摧勁樹荒楚滿中宇芳華不盈步陰條
豈再綠陽葉已改素獨居淹時運憂來將誰訴微志安
可期傷哉年歲暮

劉太尉 傷亂

晉京涉厄運神州因夷孽乾棟隋炎燎坤輿覆危轍伊
欽定四庫全書

考功集
卷二

十二

餘孱且弱負荷忝朝列愆繁既已淪哀憤徒云結惟昔
仲山甫佐宣補袞闕范生反會稽再舉夫差滅高帝還
新豐鴻門賴人傑靜言思數子顧已傷薄劣白日逝若
飛俯仰值暮節良辰不可遇我志將安設大化信盈虛
昏明亦更迭畢力濟公室引領企時哲

盧郎中 感文

日夕歷城闔迴策步林園北眺邯鄲道南瞻太行岫幽
泉激清瀾荒薄森長秀曠野零飛藿重巖響哀狖傍徨

含遠志眇眇展遐觀蕭趙負豪畧土風夙所究廉頗守
長平秦人却西寇李牧出雁門北馬避南狩疇曩邁運
會匠者顧微陋謬升朝右位濫陪羣彥後實非荆山璞
雕飾良已厚中區增震盪邊鄙多斥候投迹依帷幄短
策非可售仰慙昔賢軌嘉惠自難副斯言豈虛作亮之
惟朋舊

郭弘農 游仙

瑤溪臨赤岸曾潭揚素波巨鰲冠蓬萊玉堂映巖阿中
欽定四庫全書

考功集
卷二

十三

有羽衣客陵岡拾若華彷彿乘紫煙縹緲吸翠霞靈妃
奏妙曲六蚪駕雲車西謁王母廬東戲海童家下視九
垓內蜉蝣良可嗟

謝僕射 遊覽

蟋蟀調易苦蕙葭歌亦勞伊人曠邂逅良辰方鬱陶中
情何由寫駕言出遊遨傍洲汴湍渚登巖瞰山椒白雲
冒丹巘綠竹俯青皋夕鳥相啁啾陰籟坐飄飄佳期眇
何許佇立摘蘭苔蹉跎歲云除詠言發長謠

陶徵君

田居

眷此南村居自昔紆真想一朝就仁里愜我心所仰故
人盡比鄰時時共來往濁醪既同持清文亦俱賞日入
未能去挈杖出林莽荒徑行當闢新苗漸已長多謝沮
溺翁千載良吾黨

謝臨川

游山

徂節淹登臨開歲促遊玩陰崖雪猶積陽溪水始泮進
帆憇絕壁抗策陟窮岬撫化雖未盈即事已可玩幽谷

風華媚晴峯雲彩粲尋異迹轉緬覽勝景迭換洲分島
參錯巖聚岫迴亂丹梯架懸梁石室構層館初經洞穴
底乍出翠微半羽人謝世運靈景變昏旦汗漫無冥筌
疏屬有塵絆放懷聊自慰含情為誰歎

顏特進

侍宴

鈞臺書夏典靈囿誦周篇嘉會隆先祀豫遊及茲年春
方協時律秘駕動星躔平圃躋倒影神臯徑中天赤羽
匝曾嶠青翰驚廣川華幢互幽藹藻帳競高褰首歲布

皇澤萬象光且鮮
炙晷曜微霄宿氛
霽遠山瑞烟拂蘭
甸祥飈汎芝屢
睿眷備終讌宸惠
普下筵從邁咸世
哲賡歌畫朝賢
弱短困孤蹇明淑
慚衆妍勅躬方自
勗敷言非可宣

謝法曹

贈別

駕言理行轡
逝將越故林
出邁薄長浦
還望蔽高岑
懷歸絕懽念
悼別多苦心
遥遥從此辭
悠悠存所欽
右一
所欽不可攀
道塗亦云艱
綢繆居人思
悽愴客子顏
去

留勢並異聚散情相關傾側我西路偃仰爾東山

右二

東山及仲春愉悅對芳辰倚巖聽鳴嚶俯澗睇遊鱗遠
尋協要妙近探謝器塵邈矣隱淪者悲哉行旅人

右三

行旅已經時遂令憂若滋凝滯風潮際遲迴雨雪期繁
攬指曲汜弭棹停空坻寤寐孰與語拊枕怨乖離

乖離焉有常佳侶若參商諧合無定端契濶殊未央勞
歌欲自慰贈言非可將寄款託微波延佇惠來章

鮑參軍

戎言

家世隸部曲，少小長幽并。
慣聞豪俠節，恥預市井名。
邊秋北馬肥，戎帳入龍城。
候騎速如飛，一軍振且驚。
攬弓引鳴鈇，行行遂徂征。
日落長風起，愁陰千里生。
天時正懟怒，意氣亦自盈。
左驅鮮卑壘，右逐單于營。
還師報天子，受爵過秦京。
開宴列邸舍，交懽競公卿。
一旦收奇績，千載揚英聲。

游仙

十首

靈洲無氛翳，石嶼屯翠霞。
遙望青冥中，鬱鬱真人家。
真

人出遨遊雲車一何多列坐玉臺上俛視瑤池波素女
絃清商窈窕雜織羅神颺扇珠林哀響自相和歡來輟
羽觴同賦升天歌

重華邈不作大道日以隱鳳鳥每高翔麒麟擺羈引志
士悲時運光跡若電泯臨淵漱珠水棲山拾雲菌縱身
天路上謝彼世塗窮乘化遊無窮萬劫不復盡

遠遊訪玄洲西造崑崙城長風萬里至吹我飄颻行崑
崙何巖巖曲阿陰滄溟碧樹夾蘭臺雲房鬱葱青徙倚

東廂隈北上歷羽庭啟匱發靈圖上有列仙名久淹變
化塗今日迺長生

精衛填東海筑筑累形軀哲人匡宇宙天命不可須聞
有山林士棄世以自娛願言從之遊齊潔練羽書丹池
可止渴晨餐咀雲珠度紀諒非難去去勿躊躇

三丘阻滄波瑤木蓋雲崖陰林隕珠寶白鵠連翩飛仙
者五六月羨門與安期晞髮洞房阿石室清逶迤我行
入名山彷彿見之陵風歛焱舉何時復來歸

東南有青雲鬱鬱照瀛洲岩隈列紫林丹水絡曾丘峨
峨三珠宮遠望似烟浮山川屬靈壤光麗異神州列真
乘羽車妖女並來遊蒼龍扶玉軼翼以雙素蚪羲和不
敢驅朱光正淹留徘徊離宮中歲紀歟千周

天地有否塞賢聖困無佐潛龍應初九鶴鳴疇與和九
州肆遐步五嶽恣高卧遠慚夸父死近悼首陽餓我生
匪金石大冶不能挫神明歷終古三光莫予過


采藥謁東海芝石被神階借問此何鄉乃是真人所青

峰萬餘仞去天復幾許
云云赤泉涌亭亭白雲
舉淒風
薄穹岫鸞鵠整其羽
空山寂無人含嘯獨延佇

短期不須更大暮
有淹滯睠然迫中抱
淪迹謝人世案牒窮
山海消玉畢年歲盛
宗籍已絕司命授靈契
形容日漸反魂魄爲我
制薪火遞相傳舟壑不
復逝

上仙有會期解化升帝鄉
消搖入雲氣迅若輕翼翔
赤霄浮九隅閭闔燦朱光
踟躕步閣道執籍朝紫房
駕言歸下都置酒宴玉堂
靈妃靡颺蓋列坐侍仙倡
絃竹間

雲和絡繹進羽觴遊行天漢上懽樂殊未央



考功集卷二